



Communicaziun allas medias

Tinizong, 04 november 2024

La purscheida da passlung an Surses vign migliorada ed augmentada

La cuminanza d'interess CI passlung Val Surses ed igl cumegn da Surses on elaboro, an vista allas sfeidas carschaintas arisguard la siertad da neiv, igl plan da maseiras «Val Surses Nordic Plus», per sierar la qualitat dalla purscheida da passlung. Chel plan ò an meira da migliorar la siertad da neiv e l'experientscha digls utilisaders, surtot antras igl adiever da neiv tecnica. Las maseiras planisadas, tgi duessan neir realisadas a parteir digl proxim anviern, cumeglian bleras activitads.

La fegnameira digl plan da maseiras «**Val Surses Nordic Plus**» è, da garanteir ena purscheida da passlung d'ota qualitat durant l'antiera staschung d'anviern. La loipa duess aveir ena fermezza suffizianta er tar periodas pi tgodas e tar paca neiv naturala. Antras igl adiever sistematic da neiv tecnica scu er igl rinforz preventiv da parts criticas digl tratg duess neir garantia, tgi la loipa saptga neir duvrada sot differentas cundiziuns dall'ora e tgi la siertad da neiv vigna maximada. Igl plan da maseiras vei or scu suandont:

- ✓ Prolungaziun e focussaziun dalla loipa annavada artificialmaintg: igls dus tratgs da totalmaintg treis kilometers vignan focussos sen en tratg da tschintg kilometers Savognin-Tinizong e prolungos, chegl tgi angrondanescha la purscheida per igls utilisaders.
- ✓ Rinforzamaint independent all'ora da puncts neuralgics: tar lis critics dalla loipa vign mess preventivamaintg neiv artificiala, per sierar bungas cundiziuns er tar situaziuns dall'ora malagreablas.
- ✓ Producziun da neiv artificiala ainten en ulterior li: per furneir ena surfatscha pi gronda u en tratg pi lung cun neiv tecnica, vign instrado en ulterior li da producziun.

- ✓ Divers pitschens migliuramaints: ulteriouras maseiras per migliurar igl evenimaint general digls utilisaders, tgi èn betg descretgas an detagl, pudessan pertutgier per exaimpel l'infrastructura, igl sarvetsch u la signalisaziun.

Chellas maseiras on an meira dad augmentar l'attractivitat dalla regiun per igls passlunghists e las passlunghistas e da pussibilitar durant l'antiera staschung en adiever sieir digls tratgs da passlung – er alloura, schi mantga la neiv naturala u schi dat fasas pi tgodas.

La purscheida da passlung ainten la Val Surses

Surses porscha daveiras en evenimaint da passlung magnific ainten ena cuntrada d'anviern spectaculara. La «loipa sursetta» cun 22 kilometers lunghezza è en tratg variia, tgi magna tras gôts navantos e sur prada averta. Cun ena differenza d'otezza da totalmaintg 300 meters porscha ella ena sfeida schibagn per passlunghists sportivs scu er per galdeiders.

La loipa supplementara dad 8 kilometers a Beiva, tgi magna sen 1'800 meters otezza tras en gôt da schembers otalpin, sa distingua antras la sia atmosfera quieta ed idillica. Chel tratg è interessant surtot per chellas persungas, tgi tschertgan ena ruta solitaria ainten ena nateira intacta.

La cumbinaziun da chellas dus loipas fò tgi la Val Surses è ena destinaziun multifara per fans da passlung.

www.valsurses.ch/de/aktivitaeten/winter/langlauf

Persunga da contact per ulteriouras infurmaziuns (betg publitgier)

– Stefan Steiner, manader svilup digl li, Tel. 081 659 11 94 u 079 777 19 23

Agiunta

– Foto loipa a Beiva (Mattias Nutt)

04.11.2024 / sf

3'199 Zeichen